

La ousc de la mendranzes

La pìcola comunitèdes linguistiches te l'Europa é manacèdes da l'outa nazionalista de n muie de goerns. Per chest i sfoes de mendranza à na pèrt fondamentèla ence de gra a internet

Te chisc ùltime egn su la piate de sfoes slovaches se à vedù de spes l'onom de Hedvig Malina, na studenta de Horné Myto, te la Slovachia - scif te n articol Jean Berg, l' diretor del sfoi de mendranza Hufvudstadsbladet. Del 2006 doi skinhaed ge é suté ados a chesta beza ajache l'aea rejonà unghereis te n lech publich. L'unghereis l'é n lengaz mender, rejonà da presciapech l'9% de la popolazion del paìsc.

Ampò l torment più gran per chesta studenta l'é tacà n'outa vegnuda fora da l'ospedèl, canche nesciuna autorità l'à cherdù a sia storia e duc si tentatives de aer giustizia se à scontrà con l goern slovach che fajea dededut per meter a tèjer la storia.

L sfoi slovach de lengaz unghereis Új Szò à portà inant n aprofondiment e, de gra a l'ostinazion de si giornalisé, l'é stat bon de oblighèr i poderes publics a entervegnir. Per chest l sfoi l'à ence ciapà l pest Midas de la Sociazion di sfoes da vignidì ti lengac mendres o regionèi, per la defendura de la mendranzes linguistiches, che les vegn discriminèdes te n muie de etres pajes de l'Europa Orientèla e i sfoes de mendranza locai no i mencia segur de argomenc. La Lituania, per ejempie, la é dò che la chier de sofoèr la gran mendranza polaca che l'é tel paìsc. I inomes polaches é traslaté per lituan, l'ensegnament del polach é semper

più smendrà e i sfoes de mendranza fèsc fadia a troèr finanziamenc.

Ma l chèder no l'é deldut negatìf per i media de mendranza europeans. Defat la difujion di sfoes su internet dèsc l met anché de meter en contat pìcoi gropes linguistics slarié fora per l mond.

Na bela storia vegn da la pìcola mendranza soraba te la Germania. L sorabo vegn rejonà demò da 50.000 jent, soraldut sentadins de la region de confin che l'é anter la Germania e la Republica Ceca. L soul sfoi da duc i dis de lengaz sorabo, Serbske Nowiny, l'à manà fora da pech sia verscion digitèla e a chesta vida l pel vegnir let da n gran numer de emigré sorabi. L sfoi propon ence na sumèda de sia piate per todesch.

La linia editorièla de la maor pèrt di sfoes de mendranza europeans, desche chela de l'Hufvudstadsbladet, l sfoi da duc i dis finlandeis scrit per svedeis, l'é chela de tor ite e no schivèr i argomenc che pel dèr d'empaz. L'obietif più emportant l'é chel de portèr dant n giornalism de calità sul lengaz medemo. L' Hufvudstadsbladet, che vel dir "sfoi da duc i dis de la capitala", con na tiratura de 47 mile copies l'é l sfoi più slarià fora anter la comunità svedeisa te la Finlandia, che raprejenta l 5,4% de la popolazion. L'é stat metù sù del 1864 e l tol dant de spes costions leèdes al bilinguism.